

2 NWER NYI PITA

1 Me Saimon Pita ji li nlokeltum no Jisos Kraist, a ntiingetib ewe, n kp'nyono nwer nyia tv ane ba ma bel ekakesehk ji nno a nno ana wahr, tib eno alehke ji Esowo, a ji Jisos Kraist nt'tahre ewahre fvfo.*

2 Nong, nnoobo, a elkoono jol go egahne ellong gb'gbal, go elkahne ni n kp'kahne Esowo, a Jisos Ntul ewahre.

Nsol nyi kpo tib eltaame

3 Esowo go ege a nsahm wo, á ma-r ka ejum ajehng ajehng ji li ka elkpin nfenfe, ji nne bahke koko, jol Esowo Esowo, tib go elkahne ni e kp'kahne nne noo no lung-r no tv elne re wahr jol go ege ellub, fere bel nnoobo enye.

4 Ano wo wahnge á ma nyam egburu enyam bi nno a nno tong-r, eji n l'jol jang jang ana Esowo, n l'taame tv enyam bio, tib eji n ma for go elbolo ni njini nyia ma bol. Nsol nyi kpo melle ane go bo a ntim re bo jo lim, nyi nyi ma wahng njini ma jol ano.

5 Esi j'nehm ana ji, nobo re wahn jo nok mbang anyehng anyehng, jo ko nnoobo budu go egahne eltaame, fere ko elkahne budu go egahna nnoobo,

6 fere jo bob elnahne antahng budu go egahne elkahne, fere jo ko elkpuumu budu go elbobo

* **1:1 1:1** Jon 16:10; Rom 9:30

elnahne antahng, fere ko eltoono ni ń kp'toono Esowo budu go egahne elkpuumu,

⁷ fere ko elkoro ni abonane ejahne kpo kor-n budu go egahne eltoono ni ń kp'toono Esowo, fere ko elkoro ni ane kpee kp-n koro budu go egahne elkoro ni abonane ejahne kpo kor-n.†

⁸ ń l'bel nsol nyia, l'jol gbalee, ń nehm tiki jol akooko ane ba ma demme go elkahne nio ni ń kp'kahne Jisos Kraist Ntul ewahre.

⁹ Nne no tohko bel nsol nyia, yebwa amahr, á kpo nyehn advrehndv.‡ Yebyini re abiafem enye nya mahne mahne, bo m-e ru wohng go.

¹⁰ Abonanee, ano wo fvfo nobo re wahn gbehđ, lohko jol ana Esowo ma-n lung, fere yehk-n re wahn jol. ń l'lim ano, ń nehm tiki gbo.

¹¹ Ana wo bahke wahnge Esowo bi kpi nnoobo ka-n nsahm nyi m bahke ma yel go ejahbetul ji li go njinanjini, ji Jisos Kraist nt'tahre ewahre, a Ntul ewahre.

Pita wo jolo nne no nyehne ellub ni Jisos go amahr

¹² Esi jia ji wahnge n kpo kon-n nsol nyia buumu ngare anyehng anyehng, jol eji ń kp'k'kahn nsol nyia, m ma fere yiimi t'tahne go etingitingi ji ń kpi no.

¹³ N kp'tiri re, n'nob eji n kpeke li go elkpın re me n mell-n, eji n kp-n buumu nsol nyia.

¹⁴ Tibre n kp'kahne re, m bahke gulu elkpoko, ana Jisos Kraist Ntul ewahre tib-m no.Š

† 1:7 1:7 Gal 5:6,22 ‡ 1:9 1:9 1 Jon 2:11 Š 1:14 1:14 Jon 21:18-19

15 M bahke noko, lim mbang bum, eji á l'jo buumu nsol nyia ngare nyi m ma tahm njini nyia sa.

16 Tibre e tohkem emongo ajehng ajehng ji wahr fumu no, eji e lennge nsahm nyi Jisos Kraist Ntul ewahre ka-n, a elbake ene ni á bahke bake. Wahr ba jolo ane ba nyehne nj'jok ellub ene.

17 E jolo ona eji Esowo Nsoo ka-e ellub, fere tehk-e, ngare nyio nyi ellum lohngo go ellub nio ni nnen, ba tob-e, ni bungu re, "A wo li akor-m mmon ewame no kpo kor-m s'sehng."*

18 E wuku ellum ni lohngo go ejahbetul Esowo, tibre e jolo a ne go mbarebare ewong jio.

19 Ellum nio ebkpe yiimi ebung ji abanyehnamahr Esowo njahm gbalee, ji ji nobo re wahn jo kunu ekpu, tibre li ana et'rekahng ji kp'yake go edi ejanngge tete efungfu se, elonlo ji efungfu kehme elyake go egahna ntim.†

20 Go ngbokambang li re wahn kahn re, nnene limm, no bahke ma lennge enyehnamahr ji bo nyono go nwer Esowo antahng.

21 Tibre enyehnamahr ajehng ajehng limm, ji ane ko ba a ji, ana koro bo, sehngem ane ba etohko ji Esowo jo melle bo, bo ba jo bung alum Esowo.‡

2

Akimfahnge at'tibi

1 Akimfahnge abanyehnamahr tob woomo go ellong ane wuku wuku jang jang ana akimfahnge

* 1:17 1:17 Mat 17:5 † 1:19 1:19 Ell 22:6,16 ‡ 1:21 1:21 2 Tim 3:16-17

at'tibi bahke tob woomo go egahne ellong.* Bo bahke koko eltibi ni ki li go etingitingi, ni kpo bvvrv ba a ni, ba semme, fere ten Nde no gunu bo. Ano wo bahke wahnge bo ranngelbo elwaare.

² Ane gbalee bahke toono mbang ebo, nyi li song kak go elranngel. Tib go bo esi wo bahke wahnge, ane jo bung ebi bada mbang nyi etingitingi.

³ Bo bahke jo baare amahr go nsol ane, fere jo tub-n aka nya bo fumu antahng, fere jo li-n nsehng. Ekidi eblab ji elam nong no kpi bo sik. Nne no bahke bo ranngel kpehme tiki la.

⁴ Eji babenjel limi abiafem, Esowo tahrem bo bum. Á rodo na bo, ro kak ebi edi, edi ji bo wob go agbekobo go ejanngel, jehk kp'siki efung elam.

⁵ Njini nyi mahne mahne, Esowo tahrem bum. Á tumu nnyel, nnyel ba bulu abi ane ba jolo go njini nyio.

Á tahre Noa wo wo, ji jo tib ane ana bo bahke lehke eno go esamahr Esowo, fere tob tahre ane asehma bako fvfo.

⁶ Esowo lame Sodom a Gomorra, fere jahm kpee fi, sa atong atong, eji l'k'kpe tiki jol. Ane bao ba, Esowo ko re á tib abi ane bako ba bahke jini elliingi.

⁷ Á tahre Lot yake, ji jolo etingi nne, ye ji abi ane bao jo ghiing-e tib go bo ebi elkpin.

⁸ Eji etingi nne jio jolo a bo o, jo nyehn nsol ana nyio efung abehng abehng, fere jo wuk, jo maang-e go ege atahng sehng tib go abi nsol nya bo jo lim.

* 2:1 2:1 Mat 24:11; Elt 20:30

⁹ Jehova kp'kahne ana á kpo tahre ane ba kp'toono mbang enye, yehke go elgaare,[†] fere kuuru abi ane, bo jo nyehn erem sik efung elam,

¹⁰ asehngesehng ane bao ba kpo jen go nnyam a ngubjing, jo lim nsol nyi ki li saang, nyi kpo kor bo, fere jo daange atubesi. Akimfahng at'tibi bao kpi esahb. Bo kpo lim akuuku. Ntul awohng awohng kpehme lub bo, bo kpo su na bo.

¹¹ Jol enjel nyi gbale gbal, fere bel nsahm sehng akimfahng at'tibi bao, bo kpehme ka bo ebi go mbang elsuku, bo l'yiimi go esamahr bi Jehova.[‡]

¹² Ane bao kpo lim eljini ana ni enyam eku-lugbe, bi ki kpi elkahne, bi bo jele bo re, bo jo bob bo, fere wul. Bo kpo su nsol nyi bo kil elkahne. Bo bahke kpoko tan ana enyam ekulugbe.

¹³ Bo bahke bele eltuuru ebo go ab'bi nya bo kpo lim. Kpo kor bo re bo li nkak ngara njul, fere jo geere. Bo l'ba woomo go egahne ellong, jo li nsol alehke, bo li ana adale nya li nne go ngubjing, a anyakenyake adehbe. Bo kpo li, fere jo bel eyebatahng eji bo kp'jene, jo nehm ane.

¹⁴ Amahr ebo ebsa go anebkal anebkal. Abi-afem kpehme tiki gbal bo. Bo kpo were ane ba kp'dulu. Bobkpili amahr abaare mal kpee. Bo li ane ba Esowo ma demme bo.

¹⁵ Bobtan mbang, eji bo ma yaange mbang nyi nno sa, fere kp'sehng go mbang nyehko. Bo kpi mbang nyi Belam toono, ji jolo mmon a Beor. Nsehng nyi ab'bi alimi jo kor-e ellehke sehng.

¹⁶ Eji á limi abiafem, bo rehk-e rehke, tibre

[†] 2:9 2:9 1 Kor 10:13; Ell 3:10 [‡] 2:11 2:11 Jud 9

mbvankang nyi kil jo bung na, á bungu go ellum ni nne, fere kpan egboolo nnyehnamahr noo.§

¹⁷ Akimfahnge at'tibi bao li ana abing alahb nya ma ka, ana akparesemsem nya nfeb kp'tahle yannge a nya. Esowo ebtoobo edi nkom ejanngé bum bo, ji bo bahke jolo go njinanjini.

¹⁸ Bo kpo bung alum elgeere, nya ki lohng ejumjum. Bo kpo ko asabsab nsol njini nya kpo kor ane go ellimi ba a nya, ba were ane ba kp'na lohngo go ellong ane ba wob go ejanngé.

¹⁹ Bo kpo nyam tong bo re, bo bahke limi bo, bo for, jol eji bofono antahng li li aju ka nsol nyi li go njini nyia, nyi bahke ranngé. Tib ejum ji kpi nne, ji ji nne li nju ka-e.*

²⁰ Eji nne ma for go asabsab nsol nya njini nyia, tib go elkahne ni á kp'kahne Ntul ewahre Jisos Kraist ji li nt'tahre, á l'kpe feere, song yel go nsol nyio, nsol nyio l'bob-e, á bahke kpe sab sehngé ana wuku wuku á jolo no.†

²¹ Jol ga nob ka ane bao li re, bo kahnem mbang nyi etingitingi, sehngé re bo kahn etingitingi jio, kehm fere yake mbarebara ntahm nyi bo ka bo.‡

²² Eblohko lim bo ana bo kpo tub elgan re, “Mbv kpo feere, song kpu akahle nya á kahle no li.” Elgan nehko kpe li re, “Ekuk ji bo m-e wulu alahb, á kpo feere, song yel adob, jo banngé.”

3

Elbake ni Jisos Ntul ewahre

§ 2:16 2:16 Jud 11; Ell 2:14 * 2:19 2:19 Jon 8:34 † 2:20 2:20
Mat 12:45 ‡ 2:21 2:21 Luk 12:47-48

¹ Akpondahme enyame, a wo li etoono nwer nyi m ma nyon tv-n. Go nwer ebal ebal nyi m ma nyon tv-n, n sebe re me n mell-n ntir atahng enyahne nyi nno, eji m ma-n buumu nsol nyia.

² N kp'sebe re me n buum-n alum nya abarebare abanyehnamahr Esowo bungu no mahne mahne, fere tob buum-n ntahm nyi e yake no ka-n, wahr ji li abatiingetib ba Ntul a Jisos ji li nt'tahre.

³ Nobo re wahn gbo mbang kahn re, es'kohro afung, ane bandiki bahke jolo, ba bahke jo lim ana ji bahke jo kor bofono antahng.* Bo bahke jo nyok-n re,

⁴ “Á nyame tong-n re, á bahke bake. Ye nona?† Bomo ngare nyi babnsoo ejahre kpo no tete sik anv, njini ka tiki yaange, kpeke li ana jolo go ngare nyi Esowo limi no.”

⁵ Bo kp'fake asamahr ebo go nkpe, jol eji bo kp'nyehne etingitingi jia ji li re, Mahne mahne Esowo b'bung, elbung abola ndi kehm jolo. Ndi lohngo go alahb. Alahb ma á ko, lim ndi.

⁶ Alahb manehm ma bulu njini nyi mahne mahne, fere ranng kpee.

⁷ Ellum n'nehm ni Esowo bungu no, ni ni wahnge á ma kuuru elbung abola njini nyia kp'siki efung bi á bahke jahme go agun. Á kp'kuuru njini nyia bum tete efung elam rehng, bi á bahke ranng abi ane.‡

⁸ Akpondahme wahn, kana jo yini ejum ji n yahke bung a, tibre goji Jehova efung abehng li ana nnya atahltahl nkpel ebal atahl awubu. Nnya

* 3:3 3:3 1 Tim 4:1 † 3:4 3:4 Mat 24:48 ‡ 3:7 3:7 2 Tes 1:8

atahltahl nkpel ebal atahl awubu li-e ana efung abehng.

⁹ Jehova kpehme laange ellimi ji á nyame no, ana egom jindiki kpo tir re, á kpo kunu afung afung. Jehova kpo kpooro, tibre á kpehme seb re nne awohng awohng kpo, tan. § Á kp'sebe re, ane kpee gbo ndon, senng njahm go bo abiafem.

¹⁰ Efung bi Ntul a Jisos bahke bake, á bahke gbede na ana nwajv. Efung bio, egburu erehm bahke jolo, tib eji elbung bahke tane.* Nsol nyi li o bahke nyane tib go elfuubu agun nio. Njini bahke fehke a nsol a nsol enye kpee.

¹¹ Eji nsol nyio bahke nyane ano kpee, anv, ane aba fuumu re wahn jol? Belen elkpin ni li eje eje, wahn jol Esowo Esowo,

¹² eji n kp'siki re efung bio bi Esowo kpir-n. Jo noken, goji efung bio l'gulu elbiingi,† bi elbung bahke lulu, fere fi kpee, nsol nyi li o fere nyane tib go elfuubu agun nio.

¹³ Wo, wahr kp'siki elbung ni nfenfe, a njini nyi nfenfe, nyi bahke jolo nob nob, ana Esowo nyame no.

¹⁴ Akpondahme wahn, eji n kp'jehke sik efung bio, jo gbelden, wahn k'bel eb'bi ajehng ajehng go esamahr Esowo. Jolen go elkoono!

¹⁵ Koon elkpuumu ni Jisos Ntul ewahre ana eltahre enahne. Ano wo fvfo Pol ekorokoro mmonanne ejahre nyono no tv-n go elkahne ni Esowo ka-e no.

¹⁶ Á bungu bada nsol nyia kpee go ege awer nya á nyono no. Go awer nyao, nsol nyindiki nyia, nyi

§ 3:9 3:9 1 Tim 2:4 * 3:10 3:10 Ell 20:11; 21:1 † 3:12 3:12 Mat 24:14; Rom 11:25

kp'riidi go elkahne. Ane ba kil kahne ejumjum, a ane ba kil toono mbang anyehng kpo rod alum nyao, jo kpiidi a nya. Bo kpo tob ko alum nyandiki nya wob go nwer Esowo, jo lim ano. Eji bo kp'limi ano, bo kpi elbo ranng.

¹⁷ Akpondahme enyame, ń kp'kahne nsol nyia wuku wuku. Jo gberen elnahne, eji abi ane ba kil bumu ntahm anyehng anyehng l'ki-n were, fere nehm-n, fere mell-n go adi nya ń jehk no.

¹⁸ Jo gbalen go nnoobo nyi Ntul a Jisos Kraist nt'tahre ewahre, wahn fere gbal go elkahne ene. Nong, ellub jol ka-e anv tete go njinanjini. Emen.

Ekajuk Scriptures Bible Portions

Ekajuk: Ekajuk Scriptures Bible Portions (Bible)

copyright © 2024 Luke Initiative for Scripture Translation and The Seed Company

Language: Ekajuk

Contributor: Luke Initiative for Scripture Translation

This translation is made available to you under the terms of the Creative Commons Attribution Share-Alike license 4.0.

You have permission to share and redistribute this Bible translation in any format and to make reasonable revisions and adaptations of this translation, provided that:

You include the above copyright and source information.

If you make any changes to the text, you must indicate that you did so in a way that makes it clear that the original licensor is not necessarily endorsing your changes.

If you redistribute this text, you must distribute your contributions under the same license as the original.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

Note that in addition to the rules above, revising and adapting God's Word involves a great responsibility to be true to God's Word. See Revelation 22:18-19.

2025-07-02

PDF generated using Haiola and XeLaTeX on 1 Jul 2025 from source files dated 2 Jul 2025

fac6af8a-bed4-59a3-a152-52e0061121a4